



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH, na 29. redovnoj sjednici održanoj 14. jula 2022. godine, usvaja

## ZAKON

### O CIVILNIM ŽRTVAMA RATA BRČKO DISTRIKTA BOSNE I HERCEGOVINE

#### DIO PRVI – OSNOVNE ODREDBE

##### Član 1 (Predmet)

Ovim zakonom utvrđuju se status i prava civilnih žrtava rata i drugih lica s prebivalištem u Brčko distriktu Bosne i Hercegovine (u daljnjem tekstu: Distrikt) i postupak za ostvarivanje prava pred nadležnim organom Distrikta.

##### Član 2 (Definicija civilne žrtve rata)

Civilnom žrtvom rata smatra se:

- a) lice kod kojeg je nastupilo trajno psihičko oštećenje usljed seksualnog zlostavljanja i silovanja, kao lice s posebnim statusom, kod kojeg se nastalo oštećenje ne utvrđuje procentom;
- b) lice kod kojeg je nastupilo trajno psihičko oštećenje u visini od najmanje 60% (šezdeset posto), usljed prinudnog rada, boravka u zatvoru, logoru ili bijegu i slično;
- c) lice kod kojeg je nastupilo oštećenje organizma u visini od najmanje 60% (šezdeset posto), usljed ranjavanja ili povreda nastalih u vezi s ratnim operacijama kao što su: bombardovanje, zalutali metak, minobacačka i topovska granata i slično;
- d) lice kod kojeg je nastupilo oštećenje organizma u visini od najmanje 60% (šezdeset posto), usljed ranjavanja ili povreda nastalih od zaostalih vojnih materijala;
- e) lice kod kojeg je došlo do naknadnog oštećenja organizma u visini od najmanje 60% (šezdeset posto) zbog bolesti, pogoršanja bolesti, dugog perioda inkubacije, gubitka ekstremiteta, gubitka vida na oba oka, mentalnog oštećenja i drugih oštećenja organizma nastalih pod okolnostima iz stava 1 tački b), c) ili d) ovog člana;
- f) lice koje je ubijeno, poginulo, umrlo ili nestalo pod okolnostima navedenim u stavu 1 tačkama a), b) ili d) ovog člana;
- g) **lice koje je rođeno usljed ratnog silovanja i ratnog seksualnog zlostavljanja lica iz tačke a) ovog stava, čiji je status utvrđen u skladu s ovim zakonom.**

#### DIO DRUGI – CIVILNE ŽRTVE RATA

#### POGLAVLJE I. LICA KOJA OSTVARUJU PRAVO NA ZAŠTITU I VRSTE PRAVA

##### Član 3 (Korisnik prava)

- (1) Korisnik prava je:

- a) civilna žrtva rata koja je oštećenje organizma ili trajno psihičko oštećenje u skladu s članom 2 stavom 1 tačkom a) ovog zakona zadobila poslije 17. augusta 1990. godine;
  - b) civilna žrtva rata iz Drugog svjetskog rata;
  - c) član uže porodice civilne žrtve rata iz člana 2 tačke f) ovog zakona;
  - d) lice koje u skladu s propisima Federacije BiH i Republike Srpske (u daljnjem tekstu: entiteti) ima utvrđen status civilne žrtve rata ili člana uže porodice civilne žrtve rata, ukoliko pravo na zaštitu ne može ostvariti po drugom osnovu ili entitetskom propisu;
  - e) osoba iz člana 2 stava 1 tačke a) koja u skladu s propisima entiteta ima utvrđen status civilne žrtve rata, ukoliko pravo na zaštitu ne ostvaruje po drugom osnovu ili entitetskom propisu;
  - f) drugo lice pod uslovima utvrđenim odredbama ovog zakona.
- (2) Pod članom uže porodice u smislu stava 1 ovog člana podrazumijeva se:
- a) bračni partner koji nije zasnovao drugi brak;
  - b) djeca rođena u braku ili van njega, usvojena djeca ili pastorčad, za vrijeme školovanja, a najduže do navršene 27. godine života i djeca trajno nesposobna za privređivanje kod kojih je trajna nesposobnost nastupila prije 15. godine života;
  - c) roditelji ili usvojitelji;
  - d) očuh ili maćeha, ukoliko nema živih roditelja.
- (3) Lice iz stava 1 tačke d) ovog člana koje ostvaruje pravo na zaštitu, ne može ista prava ostvarivati u Brčko distriktu BiH.

#### **Član 4** **(Vrste prava)**

- (1) Osnovna prava kojim se ostvaruje zaštita korisnika prava su:
- a) civilna invalidnina,
  - b) porodična invalidnina,
  - c) dodatak na njegu i pomoć drugog lica,
  - d) zdravstvena zaštita i oslobađanje od plaćanja troškova participacije za korištenje usluga primarne i sekundarne zdravstvene zaštite,
  - e) ortopedski dodatak,
  - f) naknada troškova sahrane.
- (2) Pored prava iz stava 1 ovog člana, utvrđuju se i dopunska prava:
- a) prava na pomoć u troškovima liječenja i nabavci ortopedskih pomagala;
  - b) osposobljavanje za rad u vidu profesionalne rehabilitacije, prekvalifikacije i dokvalifikacije;
  - c) pravo na posebne projekte zapošljavanja,
  - d) pravo na prioritetno stambeno zbrinjavanje,
  - e) pravo na besplatnu pravnu pomoć.
- (3) Prava iz stava 1 ovog člana ostvaruju se pod uslovima utvrđenim odredbama ovog zakona.
- (4) Prava iz stava 2 ovog člana ostvaruju se u skladu s propisima iz oblasti zdravstvenog osiguranja, zdravstvene zaštite, zaštite porodice s djecom, zapošljavanja i pružanja besplatne pravne pomoći.
- (5) Prava navedena u stavovima 1 i 2 ovog člana finansiraju se iz budžeta Brčko distrikta BiH.

#### **Član 5** **(Civilna invalidnina)**

- (1) Civilna invalidnina je novčano primanje zbog djelimične ili potpune nesposobnosti za rad na koje imaju pravo:
- a) lica iz člana 2 tačke a) ovog zakona,
  - b) lica iz člana 2 tački b), c), d) i e) ovog zakona.
- (2) Civilna invalidnina određuje se prema stepenu oštećenja organizma na način kako slijedi:

- a) za I. grupu u koju spadaju lica sa 100% (stopostotnim) oštećenjem organizma kojem je za osnovne životne potrebe neophodna njega i pomoć drugog lica, određuje se iznos od 90% (devedeset posto) prosječne mjesečne neto plate ostvarene u Distriktu;
  - b) za II. grupu u koju spadaju lica sa 100% (stopostotnim) oštećenjem organizma i lica iz člana 2 stava 1 tačke a) ovog zakona, određuje se iznos od 70% (sedamdeset posto) prosječne mjesečne neto plate ostvarene u Distriktu;
  - c) za III. grupu u koju spadaju lica sa 90% (devedesetpostotnim) oštećenjem organizma, utvrđuje se iznos od 50% (pedeset posto) prosječne mjesečne neto plate ostvarene u Distriktu;
  - d) za IV. grupu u koju spadaju lica sa 80% (osamdesetpostotnim) oštećenjem organizma, utvrđuje se iznos od 40% (četrdeset posto) prosječne mjesečne neto plate ostvarene u Distriktu;
  - e) za V. grupu u koju spadaju lica sa 70% (sedamdesetpostotnim) oštećenjem organizma utvrđuje se iznos od 35% (trideset pet posto) prosječne mjesečne neto plate ostvarene u Distriktu;
  - f) za VI. grupu u koju spadaju lica sa 60% (šezdesetpostotnim) oštećenjem organizma, utvrđuje se iznos od 30% (trideset posto) prosječne mjesečne neto plate ostvarene u Distriktu.
- (3) Mjesečni iznos civilne invalidnine utvrđuje se rješenjem prvostepenog organa.
- (4) Mjesečni iznos civilne invalidnine, utvrđen u skladu sa stavom 2 ovog člana, usklađuje se s prosječnom neto platom ostvarenom u Distriktu, svakih šest mjeseci.
- (5) Step en oštećenja organizma kao i trajno psihičko oštećenje usljed seksualnog zlostavljanja i silovanja dokazuje se nalazom i mišljenjem nadležne ljekarske komisije.
- (6) Nadležnom ljekarskom komisijom smatra se:
- a) ljekarska komisija koja je nakon 17. augusta 1990. godine u skladu s propisima SRBiH i entitetskim propisima nadležna za utvrđivanje stepena invalidnosti vojnih i civilnih lica;
  - b) ljekarska komisija koju imenuje gradonačelnik Brčko distrikta Bosne i Hercegovine (u daljnjem tekstu: gradonačelnik), na prijedlog šefa Odjeljenja za zdravstvo i ostale usluge;
  - c) stručna komisija koju imenuje gradonačelnik iz reda sudskih vještaka i to: specijalista sudske medicine, ginekolog, klinički psiholog, specijalista psihijatar i diplomirani pravnik iz reda državnih službenika zaposlenih u organima uprave.
- (7) Komisija iz stava 6 tačke c) ovog člana je multietničkog sastava i broji pet članova, a nadležna je za:
- a) davanje mišljenja o nastupanju trajnog psihičkog oštećenja nastalog usljed seksualnog zlostavljanja i silovanja, a na osnovu vlastite stručne procjene, medicinske i druge dokumentacije dostavljene od nadležnog organa, podnosioca zahtjeva ili treće osobe, uz neposredno učestvovanje podnosioca zahtjeva,
  - b) donošenje poslovnika o svom radu.

## **Član 6**

### **(Porodična invalidnina)**

- (1) Porodična invalidnina je novčano primanje zbog gubitka člana porodice, lica iz člana 2 tačke f) ovog zakona, na koje imaju pravo lica članovi uže porodice.
- (2) Porodična invalidnina ostvaruje se na način kako slijedi:
- a) ukoliko zahtjev podnosi jedan član uže porodice, određuje mu se iznos od 30% ( trideset posto) prosječne mjesečne neto plate ostvarene u Distriktu;
  - b) ukoliko zahtjev podnose dva člana uže porodice, određuje im se ukupan iznos od 50% (pedeset posto) prosječne mjesečne neto plate ostvarene u Distriktu;
  - c) ukoliko zahtjev podnose tri ili više članova uže porodice, određuje im se ukupan iznos od 55% (pedeset pet posto) prosječne mjesečne neto plate ostvarene u Distriktu.

- (3) Ukoliko podnosilac zahtjeva pravo na porodičnu invalidninu ostvaruje po osnovu dva ili više lica iz člana 2 stava 1 tačke f) ovog zakona, porodična invalidnina određena u skladu sa stavom 2 ovog člana se dodatno uvećava na način kako slijedi:
  - a) ukoliko je podnosilac zahtjeva jedan član uže porodice, povećanje iznosi 20% (dvadeset posto) od prosječne neto plate ostvarene u Distriktu, iz člana 2 stava 1 tačke f) Zakona;
  - b) ukoliko su podnosioci zahtjeva dva ili više članova uže porodice, povećanje iznosi 10% (deset posto) od prosječne neto plate ostvarene u Distriktu za svako lice iz člana 2 tačke f) Zakona.
- (4) Mjesečni iznos porodične invalidnine utvrđuje se rješenjem prvostepenog organa.
- (5) Mjesečni iznos porodične invalidnine, utvrđen u skladu sa stavovima 2 i 3 ovog člana, usklađuje se s prosječnom neto platom ostvarenom u Distriktu, svakih šest mjeseci.

### **Član 7**

#### **(Dodatak na njegu i pomoć drugog lica)**

- (1) Pravo na dodatak za njegu i pomoć drugog lica ostvaruje civilna žrtva rata I. grupe, iz člana 5 stava 2 tačke a) ovog zakona, pod uslovom da to pravo nije ostvarilo po nekom drugom osnovu.
- (2) Pravo iz stava 1 ovog člana utvrđuje se u mjesečnom iznosu od 80% (osamdeset posto) od iznosa civilne invalidnine I. grupe.

### **Član 8**

#### **(Zdravstvena zaštita i troškovi participacije)**

Pravo na zdravstvenu zaštitu i oslobađanje od plaćanja troškova participacije za korištenje usluga primarne i sekundarne zdravstvene zaštite na području Distrikta osigurava se korisniku prava iz člana 3 stava 1 tački a), b), c), d) i e) ovog zakona, koji to pravo ne može ostvariti po nekom drugom osnovu.

### **Član 9**

#### **(Ortopedski dodatak)**

Pravo na ortopedski dodatak ima civilna žrtva rata iz člana 2 stava 1 tački c), d) i e) ovog zakona u mjesečnom iznosu od 70% (sedamdeset posto) od iznosa ortopedskog dodatka za ratne vojne invalide analogno vrsti i stepenu invalidnosti ratnih vojnih invalida.

### **Član 10**

#### **(Naknada troškova sahrane)**

- (1) Pravo na naknadu troškova sahrane, u slučaju smrti lica iz člana 2 stava 1 tački a), b), c) d) i e) Zakona, korisnika prava na porodičnu invalidninu i korisnika prava iz člana 3 stava 1 tačke d) Zakona, može ostvariti:
  - a) član uže porodice umrlog ili
  - b) lice koje dokaže da je izvršilo plaćanje takvih troškova ukoliko nema živog člana uže porodice umrlog lica.
- (2) Pravo iz stava 1 ovog člana može se ostvariti pod uslovom da ovo pravo nije ostvareno po drugom osnovu ili u skladu s entitetskim zakonima.
- (3) Visina naknade iz stava 1 ovog člana utvrđuje se Odlukom koju donosi rukovodilac Odjeljenja za zdravstvo i ostale usluge Vlade Brčko distrikta Bosne i Hercegovine.
- (4) Lice iz stava 1 ovog člana ostvaruje pravo na naknadu troškova sahrane i oslobađanja od troškova plaćanja participacije za korištenje usluga primarne i sekundarne zdravstvene zaštite na području Brčko distrikta BiH ukoliko ta prava ne ostvaruje po drugom osnovu ili u jednom od entiteta.

## **POGLAVLJE II.**

### **POSTUPAK ZA OSTVARIVANJE PRAVA**

### **Član 11**

#### **(Pokretanje postupka)**

- (1) Postupak za ostvarivanje prava iz člana 4 ovog zakona pokreće se podnošenjem zahtjeva za utvrđivanje statusa korisnika prava ili zahtjeva za ostvarivanje prava nakon utvrđenog statusa.
- (2) Zahtjev iz stava 1 ovog člana podnosi se Odjeljenju za zdravstvo i ostale usluge, Službi za boračko-invalidsku zaštitu i civilne žrtve rata (u daljnjem tekstu: Služba za boračko-invalidsku zaštitu i civilne žrtve rata).

## **Član 12**

### **(Potrebna dokumentacija)**

- (1) Uz zahtjev iz člana 11. ovog zakona podnosilac zahtjeva, u zavisnosti od kategorije korisnika prava kojoj pripada, prilaže:
  - a) nalaz i mišljenje nadležne ljekarske komisije iz člana 5 stava 6 ovog zakona ili drugu medicinsku dokumentaciju o liječenju izdatu neposredno nakon nastanka oštećenja organizma;
  - b) pisana dokazna sredstva izdata od nadležnih organa, uključujući udruženja građana, nevladine organizacije i druge organizacije koje se bave traženjem nestalih lica, odnosno evidencijom ubijenih, umrlih i poginulih lica u toku rata;
  - c) pravosnažnu osuđujuću presudu radi utvrđivanja statusa, ukoliko se radi o licima iz člana 2 stava 1 tačke a) ovog zakona, koja do stupanja na snagu ovog zakona nisu imala utvrđen status civilnih žrtava rata od strane nadležnog organa Distrikta, s tim što im se to pravo priznaje počevši od dana pokretanja krivičnog postupka,
  - d) dokaz da nije korisnik prava po entitetskim zakonima.
- (2) Ukoliko ne postoji presuda iz stava 1 tačke c) ovog člana, nadležni organ dostavlja dokumentaciju stručnoj komisiji iz člana 5 stava 6 tačke c) ovog zakona na mišljenje.
- (3) Pod nadležnom ljekarskom komisijom u smislu stava 1 ovog člana priznaje se nalaz i mišljenje ljekarske komisije za utvrđivanje prava u prvom stepenu u skladu sa zakonom koji reguliše prava boraca i članova njihovih porodica, koju je imenovao gradonačelnik Distrikta.
- (4) Nadležni organ pribavlja ostalu dokumentaciju koju vode organi javne uprave Distrikta po službenoj dužnosti, a kojom se dokazuju pravno relevantne činjenice za utvrđivanje statusa korisnika prava, odnosno ostvarivanje prava u skladu s ovim zakonom.
- (5) Način utvrđivanja procenta tjelesnog oštećenja civilnih žrtava rata utvrđuje se pravilnikom koji donosi Vlada na prijedlog šefa Odjeljenja.

## **Član 13**

### **(Donošenje rješenja)**

- (1) Nadležni organ dužan je donijeti rješenje u roku od 30 dana od dana podnošenja zahtjeva.
- (2) Protiv rješenja iz stava 1 ovog člana ovlašteno lice može podnijeti žalbu Apelacionoj komisiji u roku od 15 dana od dana prijema rješenja.

## **Član 14**

### **(Izveštavanje)**

- (1) Nadležni organ dužan je najmanje dva puta godišnje podnositi izvještaj Skupštini Brčko distrikta Bosne i Hercegovine o ostvarivanju prava na zaštitu u skladu s ovim zakonom za osobe iz člana 2 stava 1 tačke a) ovog zakona.
- (2) Izvještaj iz stava 1 ovog člana sadrži:
  - a) broj podnesenih zahtjeva,
  - b) broj izdatih rješenja,
  - c) broj odbijenih zahtjeva i razloge odbijanja zahtjeva,
  - d) broj neriješenih zahtjeva navodeći razloge zbog kojih rješenje nije doneseno u zakonskom roku.

## **Član 15**

### **(Početak ostvarivanja prava)**

Pravo se stiče danom podnošenja zahtjeva, a izvršava se danom konačnosti rješenja.

**Član 16**  
**(Prijava promjene)**

- (1) Lica koja su ostvarila pravo u skladu s ovim zakonom dužna su prijaviti svaku promjenu koja je od uticaja na pravo utvrđeno u skladu s ovim zakonom, u roku od 15 dana od dana nastanka promjene.
- (2) Ukoliko kod civilne žrtve rata iz člana 2 tački b), c), d) i e) ovog zakona nastupi pogoršanje zdravstvenog stanja, takvo lice može po isteku od tri godine od dana donošenja rješenja podnijeti zahtjev za utvrđivanje novog procenta tjelesnog odnosno psihičkog oštećenja.

**Član 17**  
**(Provjera ispunjenosti uslova)**

Lice ovlašteno za vođenje upravnog postupka za rješavanje po zahtjevima iz člana 12 ovog zakona dužno je u kontinuitetu provjeravati ispunjenost uslova za ostvarivanje prava utvrđenih rješenjem.

**Član 18**  
**(Prestanak prava)**

- (1) Prava utvrđena u skladu s ovim zakonom prestaju:
  - a) smrću korisnika prava, danom smrti;
  - b) ostvarivanjem istog prava po nekom drugom osnovu, danom ostvarivanja prava ili danom saznanja za ostvareno pravo;
  - c) prestankom ispunjenosti uslova na osnovu kojih je utvrđeno pravo, danom nastanka okolnosti koje utiču na ostvarivanje prava;
  - d) danom pravosnažnosti osuđujuće sudske presude kojom je za osobu iz člana 2 stava 1 tačke a) ovog zakona utvrđeno da nad njom nije počinjeno seksualno nasilje odnosno da je pravo ostvareno na osnovu lažnih podataka i izjava datih u postupku.
- (2) Lica iz stava 1 tačke d) ovog člana koja su ostvarile pravo iz ovog zakona dužne su vratiti novčane iznose koji su isplaćeni nakon pravosnažnosti presude, zajedno s pripadajućom kamatom.

**Član 19**  
**(Neisključivost ostvarivanja prava)**

Ukoliko je lice ostvarilo jedno pravo iz člana 4 ovog zakona, ostvarivanje tog prava ne isključuje pravo na ostvarivanje drugih prava utvrđenih ovim zakonom.

**DIO TREĆI – PRELAZNE I ZAVRŠNE ODREDBE**

**Član 20**  
**(Prelazne odredbe)**

Stupanjem na snagu ovog zakona utvrđeni status korisnika prava i prava priznata po osnovu utvrđenog statusa korisnika prava ne podliježu ponovnoj proceduri utvrđivanja i priznavanja takvih činjenica pred nadležnim organom.

**Član 21**  
**(Rok za donošenje podzakonskih akata)**

Vlada je dužna u roku od 60 dana od dana stupanja na snagu ovog zakona donijeti podzakonski akt iz člana 12 ovog zakona.

**Član 22**  
**(Dužnost nadležnog organa)**

Stupanjem na snagu ovog zakona nadležni organ je dužan u roku od 60 dana od stupanja na snagu po službenoj dužnosti donijeti nova rješenja za korisnike prava.

**Član 23**  
**(Završne odredbe)**

Na pitanja koja nisu uređena ovim zakonom primjenjuje se Zakon o upravnom postupku Brčko distrikta BiH.

**Član 24**  
**(Stavljanje van snage)**

Danom stupanja na snagu ovog zakona stavlja se van snage Odluka o zaštiti civilnih žrtava rata (Službeni glasnik Brčko distrikta Bosne i Hercegovine, broj 33/12).

**Član 25**  
**(Stupanje na snagu)**

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-3314/22  
Brčko, 14. jula 2022. godine

**PREDSJEDNIK**  
**SKUPŠTINE BRČKO DISTRIKTA BiH**  
Mr. sci. Siniša Milić